

Nuusbrief van die Peter Henrich Henning Familiebond

Wingerd 205
Theewaterskloof Landgoed
Villiersdorp

Posbus 121
Villiersdorp
6848

Tel: 028 840 0113

www.henning.org

E-pos: olie4@henning.org

Verskyn vier keer per jaar: Februarie, Mei, Augustus en November



Pieter Henning in die seremoniële uniform van 'n berede polisieman tydens parlamentsopenings. Foto ongeveer 1942/43 geneem toe Pieter nog by die Polisiekollege gestasioneer was. Hy het later 'n bekwame forensiese ballistiese deskundige geword

'n Henning Berede Polisieman

b7.c1.d3.e1.f1.g1. Pieter Hendrik Adriaan Henning *27-10-1922 het die plaasskool Brakpan in die Dordrecht distrik bygewoon. Agt van die twaalf kinders in hierdie skooltjie was kleinkinders van Pieter se oupa — ook Pieter Hendrik Adriaan Henning *7-10-1859. Hierdie skool was nie ver van sy ouers se plaas, La France geleë nie, daar sy neefs en niggies Botha en Boucher, asook sy suster Marie Henning hierdie skool bygewoon het.

In 1936 gaan hy na die Dordrechtse Hoërskool. Hy matrikuleer in 1940 en begin sy opleiding in die destydse Suid Afrikaanse Polisie Kollege te Pretoria-Wes in 1941.

Na basiese opleiding word hy by die Berede Afdeling van die SAP ingedeel. Hy het verskeie staaljies vertel van die besonderse verhouding wat hy met sy perd gehad het. Een daarvan was dat die perd hom

toegelaat het om in die voerkrip te slaap wanner hy moes wag staan. Indien hy die perd

vooraf met lekkergoed beloon het, het die perd hom altyd betyds wakker gemaak as die wag-offisier sy rondtes gedoen het. Een aand het hy nie lekkers gehad nie en in die krip sy slapie gevat. Die perd het hom nie wakker gemaak nie, en hy moes maar die toorn van die offisier ontgeld.

Die Berede Afdeling het tydens Staatsparades, soos die Parlementsopening, saam met Weermag komponente opgetree. Lede van die Berede Afdeling het as "bosluise" bekend gestaan — heel moontlik omdat hulle soms soos bosluise aan die saals moes vasklou.



Troufoto van Pieter- en Bets Henning gedurende 1948 te Dordrecht

Ons tel sy spoor weer in 1946 op , toe hy na Port Nolloth verplaas is. Hier ry hy kamele op patrollies in die diamant Spergebied. Hy ontmoet ook sy toekomstige vrou, Elizabeth Louisa van Zyl Brooks (Bets), gebore 13-8-1920 hier in Port Nolloth. Sy was 'n onderwyseres. Hulle trou egter gedurende 1948 te Dordrecht.

Pieter en Bets vestig hulle te Sunnyside, Pretoria toe hy oorgeplaas word na die Suid Afrikaanse Kriminele Buro, Bosmanstraat, Pretoria waar hy opgelei is as vuurwapenskundige. Daardie jare was daar net twee van hulle wat die ballistiese eenheid beman het. Hy en ene Cromhout.

Pieter het hom onderskei as 'n uiters bekwame wetenskaplike. Die twee van hulle het destyds die hele Unie van Suid-Afrika, Suidwes-Afrika en die Britse Protektorate bedien. Vanweë die sensitiwiteit van die sake

en sy beroepsetiek is die detail van hierdie sake nooit aan huis bespreek nie.

'n Saak in die Hooggeregshof Bloemfontein dien as voorbeeld. Die advokaat vir die verdediging het Pieter vir ongeveer twee ure onder kruisverhoor geneem. Pieter het uit verskillende gesaghebbende boeke aangehaal, met spesifieke verwysing na naam, outeur, bladsy, paragraaf, ens en dan die hele toepaslike gedeelte verbatim weergegee. Dit het die Regter so beïndruk dat hy spesiale erkennig aan Pieter gegee het. Selfs die FBI het hom op 'n keer skriftelik bedank vir sy insette in 'n saak wat hulle hanteer het.

Drie prominente sake waarin hy betrokke was, is:

Duncan Donald Moodie: Het sy vrou gedurende 1961 geskiet. Hy is skynbaar die enigste Suid-Afrikaner wat twee keer vir dieselfde misdaad verhoor is.

Marthinus Rossouw. Hy vermoor Baron Dieter Von Schauroth, Maart 1961.

David Pratt. Aanslag op Dr Verwoerd se lewe. Hy het nooit in die hof verskyn vir hierdie aanslag op Dr Verwoerd se lewe nie, omdat hy in 'n psigiatriese hospitaal opgeneem is. Pieter het al die forensiese ballistiese toetse gedoen ter voorbereiding van die Staat se saak.

Kollegas van Pieter het hom onthou vir sy uitstekende geheue vir detail, sy besondere netjiese handskrif en nougesetheid in die uitvoering van sy werk. Hy was ook pynlik netjies. Pieter het ook ander mooi eienskappe gehad: Hy het baie mooi en kunstig geskilder en gehou van klassieke musiek. Hy was 'n kranige tennisspeler.

Hy was maar net nege-en dertig jaar oud toe hy gesterf het en is met volle militêre eerbewys begrawe.

Kosie Henning eerste Henning proponent in Gereformeerde Kerke



Kosie Henning en sy vrou tjie Carlizé. Kosie is nou beroepbaar as predikant

b6.c4.d1.e5.f5.g6.h3.i3. Jacobus Adriaan Gerhardus (Kosie) Henning gebore 17 Julie 1993 is na sy pa vernoem. Waar sy pa se noemnaam Koos is, het hy natuurlik Kosie geword. Pa Koos is natuurlik 'n doktoraal gekwalifiseerde bodemkundige en verskaf konsultasiedienste vir blomboere. Hy is ook die kranige gewigoptel-kampioen waaroor ons verskeie kere berig het. Hy en sy gesin woon in Nylstroom.

Kosie word groot in Nylstroom, waar hy in 2011 matriek skryf. Hy het in matriek reeds geroepe gevoel om vir predikant te studeer. Hy begin dus in 2012 Teologie studeer by die Potchefstroom kampus van die Noord-Wes Universiteit en het aan die einde van 2017 sy studies voltooi en is nou gekwalifiseerd om as predikant in die Gereformeerde Kerke beroep te word.

Waar verskeie Henning families sedert 1859 van die eerste lidmate van die Gereformeerde Kerke in Suid-Afrika was, is Kosie die eerste Henning wat in hierdie kerke as predikant kwalifiseer. Daar was wel Henning dogters wat met mans getroud was, wat predikante in Gereformeerde gemeentes was en wat pastorie moeders geword het, maar nog nooit enige Henning man nie.

Kosie sê dat in die afgelope ses jaar het die Here deur middel van sy studies, sy vriende, sy ampswerk by die Cachet gemeente in Potchefstroom

en hoofsaaklik sy Woord met hom gewerk en in hom die ywer bewerkstellig om in God se koninkryk te dien.

Kosie is in Maart 2016 getroud met Carlizé, die meisie wat hy al van Graad 10 af sy nooi noem. Sy is tans 'n onderwyseres in Orkney by Western Reefs Primary. Sy het 'n besondere gawe met kinders – veral individueel.

Soos sy pa is Kosie ook baie lief vir sport en doen ook gewigoptel in sy vrye tyd. Hy en Carlizé is baie lief vir die natuur en hulle stap graag staproetes. Hy en Carlizé sien daarna uit om te dien waarheen die Here hulle roep.

Dit is duidelik dat die Gereformeerde Kerk Nylstroom 'n belangrike rol in die geskiedenis van Henning families speel. Proponent Ksie Henning sal in alle waarskynlikheid die eerste Henning predikant in die Gereformeerde Kerke word. Hierdie gemeente het egter ook twee predikante gehad wie se eggenotes nooit Henning was en hulle was susters van mekaar. Die volgende artikel handel oor hierdie twee susters.

Die verhaal van twee toegewyde Predikantsvroue

b6.c1.d3.e4. Andries Gerhardus Henning, gebore 31 Oktober 1959 sal altyd onthou word as die eerste baba wat met die stigting van die eerste gemeente van die Gereformeerde Kerke in die Kaapkolonie op 22 Januarie 1860 op die plaas Roosterhoek in die distrik Albert (Burgersdorp) gedoop is.

Hy en sy vrou, Hannie (Cecilia Johanna, gebore Venter) en hulle agt kinders woon agtereenvolgens te Janspoort, distrik Burgersdorp en Lemoenkloof, distrik Fauresmith. Oom Andries het sy kerk vir meer as 30 jaar lank as kerkraadslid gedien en omdat hy 'n belese en ervare man met 'n helder begrip was, was hy 'n bekende op verskillende meerdere vergaderings.



b6.c1.d3.e4. Andries Gerhardus Henning *31-10-1859 en sy gesin. Die foto is op hul 50-jarige huweliksherdenking gedurende 1930 te Lemoenkloof, Fauresmith geneem. Voor v.l.n.r.: Cecilia Johanna Venter (d/v Libertaf8]), Philopatricia(f2.g6.) Johan Yssel (s/v Catharina Maria[e4.f7.]), Cecilia Johanna Yssel (d/v Catharina Maria[e4.f7.]), Elizabeth Margaretha Venter d/v Libertaf8]). Middel: Jan Yssel en sy vrou Catharina Maria (f7) met hul jongste kind op haar skoot, Joseph Jooste (f2), vader Andries Gerhardus en moeder Cecilia Johanna (gebore Venter), Libertia Venter (f8). Agter: Andries Gerhardus (f2.g2.), Willem Frederik (f2.g4.) en Cecilia Johanna (f2.g5.)

Al sy kinders het in hul ouers se voetspore gevolg en was op een of ander wyse in die kerk betrokke.

Hierdie verhaal gaan oor twee van oom Andries se dogters, Maria Magdalena (Miemie), vyfde kind, gebore op 8 Mei 1891 en Libertia, agtste kind, gebore 12 Mei 1901 wat beide met

Gereformeerde predikante getroud was. Hierdie twee pastoriepare het agtereenvolgens

in die Waterberg gemeente, Nylstroom gedien en oor 'n tydperk van meer as vyftig jaar, groot invloed daar uitgeoefen.

Miemie trou gedurende 1910 met Ds JP (Johannes Petrus) van der Walt. Hy is 'n jaar tevore na die Gereformeerde Kerk Waterberg (Pietersburg en Nylstroom) beroep. Hulle woon op Nylstroom en het drie seuns en vier dogters gehad. Miemie beywer haar veral vir die plek van die vrou in die Gereformeerde Kerke; die Gereformeerde Sustersvereniging; die Gereformeerde Sustersblad en die Gereformeerde Susterstudiekring. Haar eggenoot sterf gedurende 1922. Sy bly egter aan in Nylstroom tot 1930, toe sy ter wille van haar kinders se studies na Potchefstroom verhuis.

Na die dood van Ds Van der Walt beroep die Waterberg gemeente Ds Hendrik (H J S) Venter wat met Miemie Henning se jonger suster, Liberta getroud was.

b6.c1.d3.e4f8. Liberta Venter (gebore Henning) is op 12 Mei 1901 gedurende die Anglo Boere-oorlog op Burgersdorp gebore as die jongste dogter van oom Andries Henning en sy vrou Hannie van die plaas Janspoort, distrik Burgersdorp. Oom Andries was 'n vurige vaderlander en patriot en omdat hy 'n kolonialer was, is hy gedurende die oorlog deur die Britse magte as 'n rebel aangekla. Hy beland in die tronk, maar word na drie maande op borgtog van £9 000 vrygelaat. Hy is egter later vrygespreek. Oom Andries en tant Hannie Henning se agtste kind word gedurende hierdie tyd gebore en so kry sy haar mooi patriotiese naam.

'n Paar jaar ná die Anglo Boere-oorlog trek Liberta se ouers na die Oranje-Vrystaat en vestig hulle op die plaas Lemoenkloof in die distrik Fauresmith, waar sy as boeredogter grootgeword het. Haar hoërskoolopleiding het sy aan die plaaslike hoërskool ontvang, terwyl sy musiek, sang en kunsnaaldwerk privaat studeer het. Sy het as orreliste van die plaaslike gemeente opgetree en onderrig in bogenoemde kunsvakke gegee. Sy was ook sekretaresse van die gemeentelike sustersaksie. Omdat daar geen vaste predikant was nie en vanweë hierdie gesin se besonderse kennis en gawes, het hulle 'n belangrike plek en status in die gemeente Fauresmith beklee — bouers van die Gereformeerde Kerk.

Op 29 Augustus 1923 is sy met ds. H.J. Venter (1889–1964) van die Gereformeerde kerk Waterberg getroud. Hy was die opvolger van ds. J.P. van der Walt, wat met Liberta se suster Miemie (Maria Magdalena *8-5-1891) getroud was, maar in 1922 weens kanker gesterf het. In Waterberg was die Venters dekades lank nie net aktief in die gemeente werksaam nie, maar ook in die maatskaplike lewe. Van sy bevestiging op 28 September 1923 af het hy onafgebroke die gemeente Waterberg bearbei wat die latere landdrosdistrikte Waterberg (Nylstroom) en Potgietersrus beslaan het, plus gedeeltes van distrikte aan die suide, ooste en weste van die gebied en waarvan, ná hulle intrek alhier, afgestig is die huidige kerke Potgietersrus, Magol, Warmbad, Naboomspruit en Vaalwater.

Ds. Venter was gedurende die jare 1926–'38 die algemene korrespondent en konsulent van Suid- en Noord-Rhodesië, waarheen hy meermale per trein en later per motor moes gaan en meestal sy gemeente en gesin drie maande lank aaneen agter moes laat. Eenkeer het sy eggenote, Liberta hom vergesel, maar anders moes hy lange maande op diensreise gaan en moes sy met hulle kroos agterbly: Hy in die geloof op sy sending; sy in die geloof met haar roeping as vrou en moeder, ook pastoriemoeder. En

dit alles terwyl daar geruime tyd geen tweede predikant benoorde Pretoria en Rustenburg was nie.

Liberta was by uitstek 'n Gereformeerde predikantsvrou en 'n leier onder die vroue van haar Kerk. Op sosiale gebied het Liberta ook 'n groot rol in Nylstroom gespeel. Sy was in die pioniersdae tien jaar lank voorsitster van die Suid-Afrikaanse Vroue-Federasie (SAVF) op Nylstroom en die siel van alles wat gelei het tot die daarstelling van die Moedershulp-kraaminrigting. Op politieke gebied het sy jare lank op die Afdelingsbestuur van die Nasionale Party gedien en as sameroeper van die damesafdeling op stryddae 'n reuse taak verrig.

Ds. Venter het sy emeritaat in 1960 aanvaar nadat hy net die een gemeente bedien het. Uit hulle huwelik is drie dogters en een seun gebore. Liberta is op 12 Augustus 1990 te Nylstroom oorlede.

Hierdie twee nooiens Henning het oor baie jare – meer as 50! – 'n groot invloed op die Gereformeerde gemeente op Nylstroom uitgeoefen en vandag is die eerste Henning wat 'n Gereformeerde proponent is, wat as predikant beroepbaar gestel word, ook 'n boorling van Nylstroom.



Die bakkie met gesteelde avokadopere wat Pieter Henning op sy plaas vasgetrek het

Avokado diewe vasgetrek

Ons lees in die Tzaneen plaaslike koerant van 11 September 2017 van 'n groep avokadodiewe wat hulle moses teëgekom in die boorde van mnr. Pieter Henning van die plaas Cashumi in die Georges Valley gedeelte van die Tzaneendistrik. Pieter is natuurlik b7.c8.d8.e5.f3 Pieter Naude Henning * 4-11-1957 oor wie ons al verskeie kere in die Nuusbrief berig het

Goed georganiseerde diewe met bakkies en vragmotors is besig om boere in die distrik Tzaneen se ooste onder hulle uit te steel.

‘Pieter sê daar is gedurende September 2017 al tussen vier en vyf bakkievragte avokado’s uit sy boorde gesteel. Vroeër is een hele boord kaalgepluk. Hy skat dit is omtrent vyf ton vrugte wat gesteel is en dit is net waarvan hy bewus is.

Pieter het vroeg een Sondagoggend 'n groep avokadodiewe in sy boord aangekeer. Die bakkie was byna oorlaai met 80kg meelsakke vol avokado’s. “As so ‘n sak avokado’s ook 80kg weeg, was daar omtrent R29 000 se avo’s op daardie bakkie. Maar ek vermoed so ‘n sak avo’s weeg meer as 80kg,” sê Pieter.

Pieter sê hoewel boere in die verlede al gevoel het dat die polisie en houe nie streng genoeg teen vrugtediewe optree nie, lyk dit of daar hierdie keer deeglike



‘n Skets wat wyle Lou Henning, spotprenttekenaar van Rapport jare gelede vir ons van Pieter Henning bosbouboer gemaak het

ondersoek gedoen word. Die polisie het die voertuig waarmee die avokado's vervoer is gekonfiskeer en die vermeende dieve sal eersdaags in die hof verskyn.

Dit is nie net avokado's wat in dié omgewing gesteel word nie. Bosbouers het onlangs 'n forum op die been gebring om diefstal uit plantasies aan te spreek. Diewe kom saans met vragmotors in die plantasies in en kap dan groot hoeveelhede jong bome af.

“Ons forum het begin deur die polisie en howe bewus te maak van die probleem. Ons werk nou saam met die polisie en skakel met staatsaanklaers om die waarde van die produkte wat gesteel word en die omvang van die skade by hulle tuis te bring,” sê Pieter. “Ons oorweeg om die forum ook na ander landbou-kommoditeite uit te brei.”

Hy sê dit is belangrik dat wetstoepassers beseft dat boere nie kla oor mense wat enkele vrugte vaslê sodat hulle iets het om te eet nie. Die diefstal vind op groot en georganiseerde skaal plaas.

“Hierdie mense steel ons wins en vir party boere is dit nou nie meer die moeite

werd om aan te hou boer nie, want die persentasie wat oorbly in die boorde is te min.”

Dr. Theo de Jager, nuwe President van die Wêreld Landbou-organisasie, wat ook in die Tzaneen-omgewing boer, sê diefstal kos boere miljoene rande en honderde werksgeleenthede gaan in die proses verlore.

Pieter het 'n beroep op sy medeboere gedoen om moed te hou en saam te werk vir 'n oplossing. “Ons kan nie toelaat dat mense ons uit ons bedrywe uit steel nie.”

‘n Nuwe Geneesheer

b7.c2.d3.e4.f3.g2. Marthinus Christoffel (Marthinus) Henning en sy vrou Henesia van Welkom se oudste dogter, Anina *22 Oktober 1993 het matriek in 2011 met sewe onderskeidings geslaag. Sy het daarna medies begin studeer by die Universiteit van die Vrystaat. Aan die einde van 2017 het sy haar MB CHB studies suksesvol voltooi en as geneesheer gekwalifiseer. Die gradeplegtigheid was op 7 Desember 2017 te Bloemfontein. Anina doen nou haar twee jaar as huisdokter by die Bethlehem Staatshospitaal.



Anina het intussen ook op 23 September 2017 in die huwelik getree met Georg Frederik Kleynhans, gebore op 6 Oktober 1990 te Bloemfontein. Hy is 'n seun van Theo en Annelie Kleynhans van Bethlehem.

Die huwelik is voltrek by die Emoya Landgoed in Bloemfontein deur Dr Wollie Grobler van die NG Klipkerk gemeente, Bloemfontein, waar die onthaal ook gehou is.

Marthinus se vrou, Henesia was ook 'n nooi Kleynhans en nou trou hul oudste dogter ook met 'n Kleynhans, hoewel Georg se pa Theo deur 'n Kleynhans familie van Bultfontein aangeneem is. Hy dra egter 'n Kleynhans familienaam – Theodorus Philippus.

(Die Redakteur kan nie die versoeking weerstaan om darem te meld dat sy vrou, Charlotte ook 'n nooi Kleynhans was nie)

Anina Kleynhans (gebore Henning) wat in 1917 as mediese praktisyn gekwalifiseer het

Tappe Henning se stiefseun presteer



Luhann Kotze, stiefseun van Tappe Henning, in aksie vir die Biggar-rugbyklub se onder-18 span in Skotland

b9.c1.d2.e7.f1.g3.h3. Willem Taljaard Stopforth Henning gebore 6 Junie 1961 is die baie bekende oud toetskeidsregter, Tappe Henning, waaroor ons al verskeie kere berig het. Dit is bekend dat Tappe reeds sedert November 2013 in diens van die Skotse Rugbyunie is as bestuurder van skeidsregtersake, waar hy verantwoordelik is vir die opleiding van skeidsregters.

Tappe is in 2010 getroud met Elana Kotze. Haar eerste man is oorlede toe Elana drie maande swanger

met haar seun Luhann was. Sy en haar twee kinders het in Suid-Afrika agtergebly toe Tappe in November 2013 Skotland toe verhuis het. Hulle het egter by hom aangesluit in Januarie 2014.

Dit het nou aan die lig gekom dat Luhann (17) ingesluit is in Skotland se onder-18 rugbyoefengroep. Luhann bevind hom in 'n groep van 37 spelers wat op 28 en 29 Desember 2017 by Murryfield saamgetrek het. Die geelwortel is 'n plek in Skotland se span wat in Maart teen Wallis te staan kom en in April aan die sesnasies-toernooi vir Onder-18's sal deelneem.

Tappe is baie trots op hierdie stiefseun se prestasies. Hy sê dat Ruhann het nie met 'n reputasie as rugbyspeler in Skotland aangekom nie en het alles met harde werk vermag. Ruhann speel skrumskakel. Hy het sy laerskoolloopbaan by Laerskool Constantiapark voltooi, maar nooit die Blou Bulle se onder 13-Cravenweekspan gehaal nie. In Skotland speel hy vir 'n klein skooltjie, Biggar High in 'n klein dorpie (omtrent die grootte van Delmas in Mpumalanga). Om die prestasie boonop in 'n vreemde taal en in vreemde omstandighede te vermag, spreek boekdele.

Tappe sê dat Ruhann het ook Skotland se Onder-16-span verteenwoordig en het 'n junior kontrak by die Skotse Rugbyunie. Ruhann voltooi in Junie 2018 sy skoolloopbaan, waarna hy hoop om Sportbestuur in Glasgow te gaan studeer.



Lourens Henning en sy vrou Irma wat in 'n voertuigongeluk op 13 Oktober 2017 gesterf het

Afsterwe van Hennings

Dina Maria Henning (gebore Britz) *3-7-1955 (noemnaam Irma) eggenote van a1.b6.c1.d3.e5.f3.g3.h3. Gerhardus Lourens Henning (noemnaam Lourens) van Potchefstroom is op 13 Oktober 2017 oorlede. Hulle het vir hulle seun, Jopie en sy vrou, Marnice in die Wes-Kaap gaan kuier. Hulle het vroeg die oggend van 13 Oktober 2017 teruggevlieg na Oliver Tambo lughawe. Op pad huis toe vanaf die lughawe, was hulle in 'n motorbotsing. Lourens het by 'n verkeerslig wat buitewerking was gestop. Toe dit veilig was om te ry, het hy weggetrek en 'n ander motor het die verkeerslig geïgnoreer.

Die ander motor het in hulle vasgery. Die motor se lugsakke het as gevolg van die impak uitgekom. Lourens is behandel vir brandwonde vanaf die lugsakke en Irma is in die hospitaal met verskeie beserings opgeneem - haar bril het in haar gesig gebreek en haar hele gesig was vol verskeie snye. Sy is egter in die hospitaal oorlede.



Isabella Henning (gebore Snyman), vrou van Koos Henning van Uniondale wat op 20 Oktober 2017 oorlede is



Sally Posthumus (gebore Henning) wat op 9 Desember 2017 oorlede is

Isabella Elizabeth Henning (gebore Snyman) * 21-7-1942,

eggenote van b6.c1.d5.e1.f2.g1.h7. Jacobus Alwyn (Koos) Henning *6-3-1941 van Uniondale in die Klein-Karoo sterf op 20 Oktober 2017. Sy word gebore te Frankfort as die dogter van John Henry Snyman en sy vrou Isabella Elizabeth Alberts. Isabella verwerf matriek aan die Hoërskool Frankfort en gaan studeer daarna onderwys aan die Normaalkollege Pretoria (NKP). Sy hou daarna vir drie jaar lank skool by Laerskool Dr Verwoerd op Meyerton en daarna vir 25-jaar lank by Laerskool Japie Greyling te Daleside, waarna sy aftree.

Sy was baie trots op haar beroep en het altyd die kinders se belange eerste gestel. Sy het ook vir haar eie twee kinders en al die kinders van haar man, Koos, se broers en susters skoolgehou.


Sy was baie gewild onder die kinders – daarvan getuig die getal oudleerlinge wat haar roudiens bygewoon het. Sy het ook na-ure klavier- en orrellesse vir kinders by haar huis aangebied. Sy was baie betrokke by haar kerk en skoolaktiwiteite.

b6.c4.d2.e6.f3.g3. Susara

Wilhelmina Posthumus (gebore Henning) *13-7-1934 (noemnaam

Sally) is oorlede op 9 Desember 2017 te Durban. Haar lyk was vervoer na Johannesburg en sy is 15 Desember 2017 te ruste gelê in Centurion.

Sy was 'n busbestuurder vir die SA Lugdiens. Na haar man se dood het sy by haar seun in Olifantsfontein gaan woon. Sy het haar laaste paar weke by haar dogter in Durban gaan woon.



Derek Marcus Henning *13-11-1934 wat op 4 Desember 2017 te sterwe kom

b6.c3.d11.e8.f1.g3. Derek Marcus Henning * 13-11-1934

Die afsterwe van Derek Marcus Henning op 4 Desember 2017 in die ouderdom van 83 jaar is begroet met groot droefheid.

Hy word oorleef deur sy vrou, Margaret, sy kinders uit sy eerste huwelik met Joan (gebore Regen): Moira Elaine Cunningham (gebore Henning), Derek Rudd Henning, Lesley May Henning en Alicyn Vye van Maanen (Gebore Henning); dan ook sy stiefkinders, Sandra Steyn (gebore Rambert), Louise Rambert en stief-skoondogter Emma Rambert (gebore Hollingworth); sewe kleinkinders, ses stief-kleinkinders en vyf agterkleinkinders.

Derek is op 13 November 1934 in Johannesburg gebore. Gedurende 1935 verhuis sy familie na die Fort Victoria provinsie in Suid-

Rhodesië, waar sy pa in die ongerepte bosveld 'n veë- en saaiboerdery van die grond af kry. Hy bring sy kinderjare hier deur. Van vyfjarige ouderdom af is hy in die koshuis by die Fort Victoria Laerskool en later in die Chaplin Hoërskool te Gwelo in die Middelande, waar hy op akademiese – en sportgebied presteer.

Na sy skoolloopbaan, begin hy werk vir die regering in Salisbury in Mashonaland. Hy speel nog rugby en ding mee in duik. Hierna sluit hy by sy ouer broer, Rex op sy plaas in die Marondellas aan en nog later verhuis hy na die Laeveld van Rhodesië, waar hy die grootste deel van sy lewe deurbring.

Hy boer met veë, besproeiingslanderye en neem deel aan die ontwikkeling van die Laeveld in alle vertakings.

Hy lewer groot en belangrike bydraes tot die Chiredzi en Nyika Stadsrade en verteenwoordig die Laeveld op die Kommersiële Boere-unie, Graan Producente-Unie, Katoen Producente-Unie en was voorsitter van die Triangle Lionsklub.

Hy was 'n aktiewe Polisie-Reservis gedurende die onrus met die bevrydingsoorlog en oorleef verskeie aanvalle op sy plaas. Weens die volgehoue druk van Mugabe se trawante verloor hy uiteindelik sy plaas. Hy skuif hierna na die Mkwasine suikerplaas in die Laeveld, waar hy weer reg van voor af begin en homself op die been bring met katoen en koring.

In 1982 skuif hy en Margaret na die Devuli veëplaas wat in private besit was. Hy hou vol om deel te neem aan die ontwikkeling van die gemeenskap met die bestuur en bedryf van groot getalle veë.

Na twee jaar van rugbrekende droogtes, die ineenstorting van die veëbedryf en op aandrang van die eienaars van die Devuli maatskappy, verdeel Derek die plaas in kleiner eenhede en verkoop al die eenhede namens die maatskappy. Hyself koop een van die eenhede.

Hy was instrumenteel in die stigting van die “Save Valley Conservancy”, wat al hierdie klein plasies, saam met naburige plase in ‘n groot bewaringsgebied van meer as 400 000 hektaar verenig het. Alle grensdrade binne hierdie bewaringsgebied is verwyder en ‘n wildwerende heining is rondom die gebied opgerig. Alle veë is verwyder en verskeie tipes wild, vanaf die kleinste spesies tot groot families olifante is hier hervestig vanaf droogte geteisterde gebiede. Hierdie bewaringsgebied is vandag nog in bedryf.

Derek het ‘n droom gehad om ‘n groot dam op sy veëplasie te bou. Uiteindelik het hy hierdie uitdaging aanvaar. Die operasie is met pik, graaf, kruiwaens en trekkers uitgevoer. Die water het verskeie kilometer terug gestrek en het die hele laeveld in die omgewing omvorm. Die hele gemeenskap – veral die vissermanne – het sy daad aangeprys

Gedurende hierdie tyd ontwikkel Derek Tipe2 Diabetes. Hy en Margaret verskuif hierna na ‘n klein plasie in die Vumba berge in die Ooste van Manicaland Provinsie van die huidige Zimbabwe. Hier verbou hy met groot sukses die Australiese Waratah Protea om na Nederland uit te voer. Die Zimbabwe politiek verplig hom eger om hierna op te skop en by sy vrou, Margaret se seun, wyle Shaun Rambert in Kimberley in die Noord-Kaap aan te sluit, in sy Wild-Verskuiwingsonderneming.

Nadat Shaun tragies gesterf het tydens die verskuiwing van ‘n renoster en drie jaar in Kimberley het Derek en Margaret na ‘n kleinhoeve van 21 hektaar in Louis Trichardt verhuis.

In die ouderdom van 76-jaar ontwikkel Derek Parkinson se siekte en sy gesondheid begin verswak ten spyte van die feit dat hy voortgegaan het om elke dag vyf tot ses kilometers te gaan stap en hy voortgegaan het om die landbouhoeve te ontwikkel. Gedurende hierdie tyd word hy ‘n wedergebore Christen, danksy die invloed van Angus Buchan.



Derek Marcus Henning en sy familie.

Agter l.n.r.: Derek Rudd Henning; Mandy Henning (nee Stainer); Alicyn Vye Van Maanen (nee Henning); Robert Cunningham; Moira Elaine Cunningham (nee Henning); Cecile Van Maanen; Lesley May Henning; Paul Van Maanen
Voor l.n.r.: Kleinkinders Kate Van Maanen en Jonjo Coleman; Derek Marcus Henning; Margaret Henning

Gedurende Augustus 2017 besluit die hele familie dat Derek en Margaret moet terugskuif na Zimbabwe waar hulle vestig in die pragtige Dandaro Aftree-oord in Harare. Ongelukkig was die skuif te vermoeiend en hy swig voor die komplikasies van Parkinson en Dementia, nadat hy ‘n dapper geveg opgesit het. Hy sterf vreedsaam op 3 Desember 2017.

Die merk wat hy gelaat het op die land en die harte van die mense wat hy aangeraak het, wat hom lief gehad het, sal vir altyd bly.

Hy het die hart van ‘n reus gehad, was ‘n dinamiese persoon, wat die Zimbabwiese Laeveld vir meer as vyftig jaar bewandel het. Geen hindernis

was te groot vir hom om nie uit te daag nie. Sy gedagtenis sal bly voortleef.

Martha Maria Petrosina (Makkie) Henning (gebore Venter) *20-12-1934

kom te sterwe op Nuwejaarsdag, 1 Januarie 2018 in die ouderdom van 83 jaar. Sy was die eggenote van b6.c4.d1.e5.f5.g7. Philippus Johannes Petrus Henning, wat reeds in 1995 oorlede is.

Makkie Henning word gebore as die eerste kind van Prins Willem Venter en sy vrou Johanna Maria (gebore Welmans) – hoewel net ‘n paar uur ouer as haar tweelingsuster, Hettie. Later het nog ‘n boetie, Koos en sussie, Ria gevolg. Sy word groot op hulle plaas, Kleinklipput in die Groblersdal distrik.

Sy gaan mettertyd skool by die Hoërskool Ben Viljoen (wat op daardie stadium net tot St 8 aangebied het. Sy moes dus ophou skoolgaan en gaan werk. Sy word aangestel as aptekersassistent op Groblersdal en loseer by Ds L S Kruger en sy vrou. Deur bemiddeling van Ds Kruger ontmoet sy vir Flip Henning (Philippus Johannes Petrus). Pas afgestudeer op Potchefstroom, was hy toe onderwyser aan die plaaslike hoërskool. Hulle is op 17 Desember 1955 getroud en het vier kinders in die wêreld gebring: Hannatjie, Jannie, Annatjie en Marietjie.



Martha Maria Petrosina (Makkie) Henning (gebore Venter) *20-12-1934 wat op nuwejaarsdag 2018 gesterf het

Hulle huwelik was gekenmerk deur liefde en eensgesindheid. Makkie se toewyding aan haar man en kinders was volkome. Terwyl haar man koshuisvader by die meisiekoshuis op Groblersdal was, was sy ook ‘n moeder vir baie koshuiskinders — so ook toe hy later koshuisvader by die Seunskoshuis by Potch Gimnasium was.

Dit was nie maklik om vier kinders met ‘n onderwyser se salaris groot te maak nie. Makkie het nooit hande gevou gesit nie, maar haar vele talle gebruik om die gesin te help onderhou. Sy het spyseniering gedoen, en veral haar talent vir naaldwerk ingespan deur trourokke en matriekafskeidsrokke te maak. Hierdie talent het reeds op Groblersdal na vore gekom, deurdat sy selde ooit klaargemaakte klere gekoop het. Sy het gewoonlik ‘n rol rok materiaal gekoop en dan vir haar en haar drie dogters rokkies gemaak van dieselfde materiaal.....ook g’n wonder hulle gesinnetjie het Sondae op pad kerk toe bietjie soos die Von Trapp-familie uit *The Sound of Music* gelyk nie!

Sy het as eggenoot haar man in alles bygestaan. Terwyl hy universiteitsdosent was, het hulle net buite Potchefstroom ‘n

stukkie grond met 'n plaaswinkeltjie aangeskaf. Die bestuur en bedryf van hierdie winkeltjie is feitlik geheel en al deur Makkie hanteer.



Makkie Henning en haar vier kinders tydens haar 80-ste verjaardag te Krugersdorp, Anna Catharina Smit Annatjie), Johanna Maria Harris (Hannatjie), Martha Maria Petrosina van Schaik (Marietjie), met Jan Sarel Marthinus (Jan) agter

Na Flip se dood in 1995, het sy vir baie jare by Marietjie (haar jongste dogter, wat getroud is met ds Joop van Schaik) gewoon. Makkie het dus 'n nuwe rol aangeneem, naamlik die van 'n pastorie-ouma. Ons glo al drie die Van Schaik-kleinkinders, Hanno, Marteli en Philip-Johan, kyk vandag met groot dankbaarheid terug na die bevoorregte tyd toe Ouma Makkie ook vir hulle liedjies gesing, gedigte en gebedjies opgesê en soms net lekker saam met hulle gelag het. Dan kon sy boonop lekker melkkos maak!

Na jare van saam trek met Marietjie, Joop en gesin, het Makkie die laaste fase van haar lewensreis binnegegaan by die Luipaardsvlei Ouetehuis. Omdat Hannatjie (haar oudste dogter) en haar man, Colin, die naaste aan die tehuis gewoon het, het dit ook al meer hulle verantwoordelikheid geword om te help waar nodig.

Makkie het in hierdie tyd 'n paar gesondheidsterugslae gehad, een daarvan was toe borskanker by haar gediagnoseer is. Sy was egter 'n sterk vrou. Hannatjie onthou toe hulle onderweg na die hospitaal was sodat ma Makkie 'n mastektomie kon ondergaan. Dit was so sesuur die oggend en albei was gejaagd en oorstuur en

boonop was daar verbouings voor die hospitaalingang. Makkie se heup het toe reeds begin lol en met die gesukkel haak een van die heupbene vas en sy val reg voor die hospitaal! Hanna het baie jammer vir Ma gevoel, maar tipies Ma, kon sy al sukkelende weer regop kom en haar waardigheid herwin. So het sy die operasie, chemo en bestraling aangepak en uiteindelik die kanker oorwin.

Hierna moes Makkie, wat as jong meisie 'n goeie atleet en korfbalspeler was, en gehou het van lekker vinnig stap, vele operasies aan haar knie en heupe ondergaan. Dit het egter nie gehelp nie en dit het verskeie kere gebeur dat haar heup uithaak en sy inderhaas hospitaal toe geneem moes word. Uiteindelik het alles daartoe bygedra dat sy haar bewegingsvryheid en mobiliteit verloor het.

Die laaste drie jaar van haar lewe was sy vasgekluiser aan haar bed, en by tye, 'n rolstoel. Haar leefwêreld het eensklaps drasties kleiner geword. Sy moes ten volle versorg word deur die verpleegpersoneel van die ouetehuis. In die laaste jaar veral, was haar agteruitgang merkbaar. Tog onthou haar kinders hoedat sy tot op die einde en

solank sy nog by haar bewussyn was, haar wonderlike humorsin behou het, selfs al was dit naderhand net 'n ondeunde glinstering in die oog!

Makkie se skoonseun, Ds Joop van Schaik van die Gereformeerde Kerk, Krugersdorp het die begrafnisdiens waargeneem. Sy is in die Potchefstroom Begraafplaas begrawe.

Geldsake

Ons wil weereens baie dankie sê aan al die welmenende Hennings wat oor die afgelope drie maande donasies vir die Familiebond aangestuur het. Ons wil almal opreg bedank vir hierdie pragtige gebaar. Dit toon duidelik dat die Henning Familiebond belangrik en op die regte pad is.

Ons wil almal die versekering gee dat elke sent van hierdie geld in belang van die Henning familie en in besonder die Henning Familiebond bestee sal word.

Ons bedank eerstens die sewe lede wat gereeld maandelik deur middel van 'n debietorder bydraes lewer. Dit is van onskatbare waarde vir die Familiebond.

- Jan Andries Henning en sy vrou Cornelia van Leraatsfontein, Witbank
- Jan Hendrik Henning en sy vrou Nicolina van Glenstantia, Pretoria
- Past Antonie Henning en sy vrou Nellie van Wonderboom-Suid, Pretoria
- Pieter Hendrik Henning en sy vrou Anna van Durbanville
- Runa en Sauer van Straaten van Doringkloof, Centurion
- Gesina en Mathys Spangenberg van Swakopmund, Namibië
- Pieter Jacobus Stephanus Henning van Ramsgate



Dan wil ons ook ons dank uitspreek teenoor die volgende lede wat bydraes gedurende die afgelope drie maande aangestuur het:

- Dr J A G (Koos) Henning en sy vrou, Stephanie van Nylstroom - R250.00
- O J (Ockert) Henning van Durbanville - R500.00
- Johan (Jay) Henning van Constantia, Kaapstad - R200.00
- J G (Gerhard) Henning en sy vrou Dorie van Mmabatho - R500.00
- Lizelle Henning en haar ma, Ena (weduwee van Herman Henning) van Rietfontein, Pretoria - R1 000.00
- Mev Linda van Tonder van Ferndale - R100.00
- Mev Hanneltjie (J A D) Henning (weduwee van Pieter Henning) van Doornpoort - R150.00
- Marthinus en Henesia Henning van Welkom - R400.00

Ons doen 'n beroep op alle Hennings om dit te oorweeg om van tyd tot tyd vir die Familiebond 'n donasie aan te stuur. U besluit self wat u kan bekostig.

**Die besonderhede van die Familiebond se lopende rekening is as volg:
FNB Villiersdorp (Tak 200 712); Rekeningnaam – Henning Familiebond;
Rekeningnommer – 6265 7601 483. Gebruik asseblief u voorletters en van en as
dit moontlik is, u lidnommer, as verwysing wie die deposito gemaak het.**

Henning Aandenkings

Ons het steeds die volgende Henning aandenkings beskikbaar. U kan telefonies (028 840 0113 of sel 082 355 3801) of per E-Pos (olie4@henning.org) bestel. Ongelukkig word posgeld volgens die gewig van die pakkie bygevoeg, dus sal ons u eers in kennis stel hoeveel die posgeld sal bedra, voordat u die geld in die Familiebond se rekening deponeer. Rekening besonderhede: **FNB Lopende rekening 6265 7601 483; Tak nr 200 712. Rekening naam – Henning Familiebond. Vermeld u lidnommer en/of voorletters en van as verwysing**

1. Teelepel — R50.00 elk (goud geplateer) **Pragtig as ‘n stel van ses of meer, saam met ‘n suikerlepel**, of individueel in ‘n teelepel versameling
2. Suikerlepel (goud geplateer) — R54.00 elk
3. Lapelwapens — R30.00 elk
4. Mansjetknope — R100.00 stel. **Werklik pragtig! Kan met trots gedra of in ‘n vertoonkas vertoon word. Sal ook ‘n mooi erfstuk word**
5. Skryfblokke (50 bladsye) — R30.00 elk
6. Henning CD — R125.00 elk plus R10.00 posgeld
7. Doen eers navraag wat u pakkie se posgeld sal bedra voordat u enige geld inbetaal. Onthou ook dat as u wil hê dat ons die pakkie met geregistreerde pos stuur, dit ‘n ekstra R30.00 sal kos. Aflewering d.m.v Postnet kos R99.00 vir ‘n pakkie van 1 Kg.



Tensy u ‘n groot bestelling van verskeie items plaas, behoort die posgeld nie meer as R20.00 te wees nie.

Ondersteun asseblief die familiebond.

- | |
|---|
| <ol style="list-style-type: none">1. Henning CD – R125.002. Skryfblok (50 bl) – R30.003. Suikerlepel – R54.004. Lapelwapen – R30.005. Teelepel – R50.006. Mansjetknope – R100.00 |
|---|

Met die finalisering van die Nuusbrief het dit onder ons aandag gekom dat b7.c7.d10.e3.f1.g2.h1. Philip Henning (17) wat die Onder-18 seuns tenniskampioen van Suid-Afrika is, besig is om goed te presteer in Australië ten einde toelating te kry tot die Australiese Junior Tenniskampioenskappe. Ons sal in die volgende nuusbrief vertel of hy toelating gekry en hoe hy gevaar het.